

Declaración con ocasión do quincuaxésimo aniversario
Da sinatura dos Tratados de Roma

Durante séculos Europa foi unha idea, unha esperanza de paz e entendemento. Esta esperanza fíxose realidade. A unificación europea procurounos paz e benestar, cimentou a nosa comunidade e superou as nosas contradicións. Cada membro contribuíu a unificar Europa e a fortalecer a democracia e o Estado de Dereito. Grazas ao ansia de liberdade das xentes de Europa Central e Oriental, hoxe superouse definitivamente a división artificial de Europa. Coa integración europea demostramos que aprendemos a lección das confrontacións sanguentas e dunha historia chea de sufrimento. Hoxe vivimos xuntos, dunha maneira que nunca foi posible no pasado.

Os cidadáns e cidadás da Unión Europea, para a nosa fortuna, estamos unidos.

I

Na Unión Europea estamos facendo realidade os nosos ideais comúns: para nós, o ser humano, é o centro de todas as cousas. A súa dignidade é sagrada. Os seus dereitos son inalienables. Mulleres e homes teñen os mesmos dereitos.

Esforzámonos por acadar a paz e a liberdade, a democracia e o Estado de Dereito, o respecto mutuo e a responsabilidade recíproca, o benestar e a seguridade, a tolerancia e a participación, a xustiza e a solidariedade.

Na Unión Europea vivimos e actuamos xuntos de maneira singular, e isto maniféstase na convivencia democrática entre os Estados membros e as institucións europeas. A Unión Europea fúndase na igualdade de dereitos e a convivencia solidaria. Así facemos posible un equilibrio xusto entre os intereses dos distintos Estados membros.

Na Unión Europea preservamos a identidade dos Estados membros e a diversidade das súas tradicións. Valoramos como unha riqueza as nosas fronteiras abertas e a viva diversidade das nosas linguas, culturas e rexións. Hai moitas metas que non podemos

acadar solos, pero si xuntos. As tarefas repártense entre a Unión Europea, os Estados membros, as súas rexións e os seus municipios.

II

Enfrontámonos a grandes desafíos que non se deteñen nas fronteiras nacionais. A Unión Europea é a nosa resposta a eles. Só unidos podemos preservar no futuro o noso ideal europeo de sociedade, en beneficio de todos os cidadáns e as cidadás da Unión Europea. Este modelo europeo une o éxito económico e a responsabilidade social. O mercado común e o euro fannos fortes. Con eles podemos adaptar nosos valores a crecente interdependencia económica mundial e a cada vez máis intensa competencia que reina nos mercados internacionais. A riqueza de Europa baséase no coñecemento e as capacidades das súas xentes; esta é a clave do crecemento, o emprego e a cohesión social.

Vamos loitar xuntos contra o terrorismo e a delincuencia organizada e a inmigración ilegal. E farémolo defendendo as liberdades e os dereitos cidadáns incluso no combate contra os seus inimigos. Nunca máis se debe deixar unha porta aberta ao racismo e á xenofobia.

Defendemos que os conflitos do mundo se resolvan de forma pacífica e que os seres humanos non sexan vítimas da guerra, o terrorismo e a violencia. A Unión Europea quere promover no mundo a liberdade e o desenvolvemento. Queremos facer retroceder a pobreza, a fame e as enfermidades. Para isto vamos seguir exercendo o noso liderado.

Queremos levar xuntos a iniciativa en política enerxética e protección do clima achegando a nosa contribución para contrarrestar a ameaza mundial do cambio climático.

III

A Unión Europea nutrirase tamén no futuro da súa apertura e da vontade dos seus membros de consolidar ó mesmo tempo xuntos, o desenvolvemento interno da Unión Europea. Esta seguirá promovendo tamén a democracia, a estabilidade e o benestar ademais das súas fronteiras.

Coa unificación europea fíxose realidade un soño de xeracións anteriores. A nosa historia reclámanos que preservemos esta ventura para as xeracións vindeiras. Para isto debemos seguir adaptando a estrutura política de Europa á evolución dos tempos. Estamos aquí, polo tanto, cincuenta anos despois da sinatura dos Tratados de Roma, unidos no empeño de dotar á Unión Europea de fundamentos comúns renovados de aquí ás eleccións ao Parlamento Europeo de 2009.

Porque sabemos que Europa é o noso futuro común.